



La grupp svizra per selvicultura da muntogna fa ina dieta: «I return en moda pli effizienta e pli efficazia cun ils donns da stemprads en il gaud da muntogna.

MAD

Pronts per futurs stemprads

■ (cc) La grupp svizra per selvicultura da muntogna sco rait dals spezialists svizzers per la tgira dal gaud da muntogna salva questa stad ina dieta sut la devisa «I return en moda pli effizienta e pli efficazia cun ils donns da stemprads en il gaud da muntogna».

La grupp consista da circa 50 commembers che derivan da l'entira Svizra e da l'exteriur vischin. L'inscunter ha lieu dals 20 fin ils 22 d'avust a Cuira.

En il center da la discussiun stattan las surfatschas da gaud ch'èn vegnidas donnegiadas fermamain la fin da favrer 1990 tras il stemprà Vivian. Durant trais dis vegnan barattads ed evaluads las experientschas ch'èn vegnidas fatgas en la pratica ed ils resultats da la perscrutaziun

da l'institut federal per la perscrutaziun da gaud, naiv e cuntrada (WSL). Ils resultats da la discussiun duain permetter als practicists forestals da reagir svelt e cunzunt cun las dretgas mesiras envers futurs stemprads.

L'onn 1990 ha il Vivian culpì ferm ils gauds tar Curaglia, Mustér, Tujetsch e Pfäfers (Son Gagl). La dimensiun enorma dals donns ha pretendì ina priorisaziun rigurusa. Sin intginas surfatschas han ins laschà star tut la laina terrada. Plantaziuns da bostgs giuvens èn vegnidas fatgas mo sin ina part da las surfatschas donnegiadas. Als lieus ils pli exposts han percenter stuì vegnir costruids rempars, cunzunt cunter moviments da la naiv.

Sa meglierar cun dumandar

Co èn sa cumprovads quests differents tractaments? Èsi per exempel stà gist da surlaschar ina part da las surfatschas donnegiadas a la regiuvinaziun natirala? È la laina terrada da quella giada in privel u promova ella percenter la nashientscha d'in gaud? Intervegniss ins oz auter, cunquai ch'ins enconuscha ils resultats? Per responder talas dumondas vegnan ils participants a sa render en gruppas en las 16 anteriuras surfatschas donnegiadas dal Vivian. Enconuschend las mesiras prendidas ed ils resultats da la perscrutaziun qua avant maun vegnan els ad analizar il stadi actual dal gaud.